

I studafech vedui dai picoi

I bec de la scola populèra à reingrazia i pompieres de sie paìsc con dessegnes e dediches, che fèsc bela parbuda ti calandères del 2010 fac dai gropes de Cianacei, Poza e Vich

Desche ogne an i studafech de Fascia, desche forma de autofinanziament, i à enjignà i calandères per l nef an giusta scomenzà. Chesta an i gropes di paìjes de Cianacei, Poza e Vich ge à dedicà la piates di meisc ai bec de la scola populèra: per cajo, senza n rejonèr dantfora ne dezider adum, i desferenc gropes se à pissà de viventèr i calandères coi dessegnes fac dai scolees.

L'é jà da n pec de egn che i studafech met gran empegn per se arvejinèr ai più picoi, per ge dèr l met de cognoscer la regoles de la segurezza, ma ence per ge meter dant la realtà del

volontariat, con chela de tor ite dapò neves arlieves.

Per ge moscèr ai bec che se à da fèr en cajo de fech, te Fascia vegn endrezà la di de evacuazion te la scoles, perveduda dal program de la scola populèra e fata col didament di studafech. A chesta

proa tol pèrt i maestres, ma vegn domanà soraldut l didament di chisc picoi arlieves del davegnir. L'ocajion la é dalbon utola per duc, ma soraldut de sodesfazion per i bec che vigni an i à l met de se scontrèr co na lezion del dut neva e se meter endirao a la proa


moscian sia capacità de colaborazion en cajo de fech o pericol te scola.

Dò da chesta ejercitazion, la maestres ge à domanà ai bec de conservèr n recort de chesta di zis emportanta, e i scolees à fat a gara per palesèr miec che i podea sie

sentiment de stima e amirazion per chisc voluntadives, reingrazian i studafech con bie dessegnes e con dediches o poejies.

Stolc de duc chi dessegnes e de la notes che i scolees ge à dedicà, i studafech se à pissà de coer l'ocajion e tor sù i dessegnes per i meter sul calandèr del 2010. Anter duc l'é stat cernù i dessegnes più fora de i etres e chi co la dedica più sentuda.

Meter fora sui parees de noscia majons chisc calandères da la piates algegres, viventèdes dai beloc dessegnes di bec, o ence chi con i retrac di componenc di etres gropes di studafech del distret de Fascia, ge darà l met a duc i sentadins de noscia val de recordèr e reingrazièr via per dut l'an, meis dò meis, chisc voluntadives che i é semper a la leta per la segurezza de noscia jent, e i se à vadagnà ence l'amirazion e i complimenc di picoi scolees fascegn. (vr)



I dessegnes di scolees de Cianacei e di chi de Poza fèsc bela parbuda sui calandères di studafech di respetives paìjes.